

Morning Dogri (NSD) National News Bulletin 29-03-2025

आकाशवाणी

- प्रधानमंत्री नरेन्द्र मोदी होरें बिहार च कोसी मेची अंतरराजीय, परियोजना ते चार लेन आले पटना सासाराम कारीडोर दी मंजूरी देने दे मंत्रिमंडल दे फैसले दी सराहना कीती ऐ।
- राष्ट्रपति द्रौपदी मुर्मू होरें अज्ज नमीं दिल्ली च दऊं दिनें दे पर्यावरण सम्मेलन-2025 दा उद्घाटन करगंन।
- महाराष्ट्र सरकार नै लोकें च भर्म पैदा करने ते गुमराह करने आलियां खबरां फैलाने आलें कन्नै निबड़ने लेई दिशा निर्देश जारी कीते न।
- भारत नै भूचाल प्रभावत म्यांमार लेई 15 टन कोला मती राहत सामग्री भेजी ऐ।
- जार्डन च चलै करदी एशियाई कुश्ती प्रतियोगिता-2025 च मनीषा भनवाला नै 2021 दे बाद भारत लेई पैहला सुन्ने दा तगमा जित्तेआ।
- आईपीएल च जंदी रातीं रॉयल चैलेंजर्स बैंगलुरु नै चेन्नई सुपर किंग्स गी 50 रंज कन्नै हराया।

<><><><><><>

PM-Cabinet Decision

प्रधानमंत्री नरेन्द्र मोदी होरें आखेआ ऐ जे बिहार च कोसीमेची अंतर-राज्य आली लिंक परियोजना गी पीएमकेएसवाई-एआईबीपी दे तैहत शामिल करने ते 4 लेन आली पटना-सासाराम कॉरीडोर परियोजना गी मंजूरी देने दे मंत्रिमंडल दे फैसले दी सराहना कीती ऐ। सोशल मीडिया पर पोस्ट च श्री मोदी होरें आखेआ जे सरकार बिहार दे पूरे पराते विकास लेई वचनबद्ध ऐ। इस्से कड़ी च प्रधानमंत्री कृषि सिंचाई योजना तैहत कोसीमेची अंतरराजीय लिंक परियोजना गी मंजूरी दित्ती गई ऐ। उनें आखेआ जे एहदे कन्नै ना छड़ा इक बड़्डे क्षेत्र गी सिंचाई लेई पानी थहोग बलके करसानें दी ओंदन बी बधग।

<><><><><><>

President

राष्ट्रपति द्रौपदी मुर्मू होर अज्ज नमीं दिल्ली च पर्यावरण बारे राष्ट्रीय सम्मेलन-2025 दा उद्घाटन करगंन।

दऊं दिनें दे इस सम्मेलन च पर्यावरण दे माहिरें, निति-निर्माताएं ते कार्जकत्पाएं गी पर्यावरण सरबंधी महत्वपूर्ण मुद्दें पर चर्चा ते बचार बंटादरा करने दा मौका थ्होग। सम्मेलन दा सरिस्ता राश्ट्रीय ग्रीन ट्रिब्यूनल एनजीटी आस्सेआ कीता जा'रदा ऐ। सम्मेलन च 4 प्रमुख तकनीकी गेड़ लोआए जांगन जिंदे च जलवायु परिवर्तन, प्रदूषण दी रोकथाम, जैविक बन सबन्नता दी सांभ संभाल ते टिकाऊ विकास सनें पर्यावरण चुनौतिएं पर चर्चा कीती जाग।

<><><><><><>

Electronics

सरकार नै देश च इलैक्ट्रानिक्स चीजे दे विनिर्माण गी बढ़ावा देने ते इलैक्ट्रानिक्स आपूर्ति श्रृंखला गी मजबूत करने लेई इलैक्ट्रानिक्स उपकरण विनिर्माण योजना गी मंजूरी देई दित्ती ऐ। नमीं दिल्ली च संवाददाताएं गी जानकारी दिंदे होई सूचना ते प्रसारण मंत्री अश्विनी वैष्णव होरें आखेआ जे पिछले 10एं ब'रे च इलैक्ट्रानिक्स क्षेत्र च जबरदस्त बाद्धा होआ ऐ। उनें आखेआ जे इनें ब'रें च इलैक्ट्रानिक्स उत्पादन 17 प्रतिशत दी सलाना कंपाउंड वृद्धि कन्ने 5 गुणा बधी गेआ ऐ जदके इलैक्ट्रानिक्स निर्यात च 20 प्रतिशत दी कंपाउंड वृद्धि दर दिक्खी गई ऐ। उनें आखेआ जे पिछले 10एं ब'रें च देश च इलैक्ट्रानिक्स विनिर्माण 25 लख रोजगार पैदा कीते न। केन्द्री मंत्री होरें आखेआ जे इलैक्ट्रानिक्स उपकरण विनिर्माण योजना लेई 22 ज्हार करोड़ रपे शा मते दी माली मदद दित्ती जाग।

<><><><><><>

Maharashtra Govt.

महाराष्ट्र सरकार नै लोकें च भर्म भलेखा पैदा करने ते गुमराह करने आलियां खबरां फैलाने आले कन्ने निबड़ने लेई सब्बने मैह्कमें गी विशेष दिशा निर्देश जारी कीते न। राज्य सरकार दे बारे च बेबुनियाद ते गुमराह करने आलिए खबरें पर तुरत कारवाई करने दे प्रस्ताह् राएं दिशा-निर्देश जारी कीते न। एह् प्रस्ताह् सरकार सरबंधी प्रिंट, इलैक्ट्रानिक, सोशल मीडिया ते डिजीटल समाचारें पर तक्क रखने लेई 10 करोड़ रपे दी अंदाजन लागत मीडिया निगरानी केन्द्र खडेरने दे 2 हफ्ते बाद आया ऐ। एह् केन्द्र समाचारें दी जांच करोग ते जेहड़ा कोई बी गलत मंशा कन्ने लोकें गी गुमराह करने ते गलत प्रापगैंडा करने च मुलव्वज पाया जाग, ओह्दे खलाफ सख्त कारवाई कीती जाग।

<><><><><><>

India Myamaar

भारत नै भूंचाल प्रभावत म्यांमार गी कोई 15 टन राहत सामग्री भेजी ऐ। एह सहायता हिंडन एअर फोर्स स्टेशन थमां भारतीय ब्हाई फौज दे सी-130जे जहाजै राएं पजाई गई ऐ। इस राहत सामग्री प्रभावत लोकें लेई तम्बू, स्लीपिंग बैग, कंबल, रूट्टी ते जनरेटर सेट बगैरा शामिल न। एहदे इलावा प्रभावत लोकें दी मदद लेई ते उंदे इलाज च कम्म औने आलिं चीजें च दोआइयां, सरिंजां, दस्ताने ते पट्टियां बी भेजियां जा'रदियां न। प्रधानमंत्री नरेन्द्र मोदी होरें म्यांमार ते थाईलैंड च कल आए दे भूंचाल पर चिंता प्रगट कीती ही। सोशल मीडिया पर इक पोस्ट च मोदी होरें दौनें देशें दे नागरिकें दी सुरक्षा सलामती ते भलाई दी कामना कीती ही ते आखेआ हा जे भारत हर मुमकिन सहायता देने लेई तैआर ऐ। मोदी होरें विदेश मंत्रालय गी आखेआ हा जे भूंचाल प्रभावत दौनें मुखें दिएं सरकारें दे संपर्क च रौहन ते उंदिएं जरूरतें मूजब राहत सहायता दी बवस्था कीती जा। जियां जे पैहले बी खबर दित्ती जाई चुकी दी ऐ जे म्यांमार ते थाईलैंड च कल आए दे जबरदस्त भूंचाल कारण केई इमारतां, पुल ते बड्डे-बड्डे निर्माण ढेई गे हे। म्यांमार च 144 ते थाईलैंड च 10 लोकें दी मौत होई गई हते केई लोकें दे घायलें होने दी बी खबर ऐ।

<><><><><><>

PM India First

प्रधानमंत्री नरेन्द्र मोदी होरें आखेआ जे भारत प्रिमि देश दी विदेश नीति दा मूलमंत्र बनी गेआ ऐ। भारत हुन छड़ा विश्व बवस्था च हिस्सा लै'रदा ऐ ते बलके भविष्य गी आकार देने ते उसी सुरक्षत करने च योगदान देआ'रदा ऐ। श्री मोदी होरें अज्ज नमीं दिल्ली च इक निजी टीवी चैनल आस्सेआ आयोजित इक कार्यक्रम गी संबोधत करा'रदे हे। उनें आखेआ जे पैहले भारत दी विदेश नीति सब्बने कन्नै पूरी बनाए रखने दी ही, मगरा हुन सब्बने कन्नै रली-मिलियै कम्म करने दी ऐ। प्रधानमंत्री होरें आखेआ जे भारत नै एकाधिकार शा मता मानवता गी प्राथमिकता दित्ती ऐ ते इक सम्मान भागीदारी जकीनी करने लेई 21मीं सदी इक नमीं विश्व बवस्था दे निर्माण दी बत्ते पदरी करा'रदा ऐ।

<><><><><><>

Bihar Amit Shah

केन्द्री गृहमंत्री अमित शाह होर बिहार दे दौरे पर जांगन, अपने दऊं दिनें दे दौरे दरान श्री शाह होर गोपालगंज च बक्ख-बक्ख कार्यक्रमें जेह्दे च इक जनसभा च बी शामिल होंगन ते पटना च राज्य सतह दे सहकारी सम्मेलन च शामिल होंगन। पटना पुज्जने दे बाद श्री शाह होर पार्टी लीडरें कन्नै संजा लै बैठक करगंन, जिस च लोकसभा ते राज्यसभा दे सांसद, विधायक, एमएलसी ते होरने चुनाएं दे नुमायंदे बी शामिल ऐन। ओह बीजेपी दी राज्य समिति कन्नै बी बैठक लांगन। कल श्री शाह होर पटना च राज्य सतह दे सहकारी सम्मेलन दा उद्घाटन बी करगंन। ओह कोई 8 सौ करोड़ रपे दी लागत दी परियोजनाएं ते बक्ख-बक्ख विकास कार्यक्रमें दा नीह पत्थर ते कन्ने गै केइएंगी देश गी समर्पित बी करगंन।

<><><><><><>

Amit Shah Fire Station

केन्द्री गृहमंत्री अमित शाह हुंदी अध्यक्षता च इक उच्चि सतह दी कमेटी नै राज्यें दिएं अगग साहलने सरबंधी फायर सर्विसिस दे विस्तार ते उनेंगी अज्जै कल्लै दे ढंगै दी बनाने सरबंधी योजना दे तैहत 5 राज्यें लेई इक जहार 604 करोड़ रपे कोला मती दिएं परियोजनाएं गी मंजूरी दित्ती ऐ। एह राज्य न बिहार, गुजरात, झारखंड, महाराष्ट्र ते कौल। समिति नै अक्टूबर 2023 दे दरान सिक्किम च इक ग्लेशियर झील दे फटने कारण आए दे हाड़ ते एह्दे करी होई दी भारी तबाही दे मगरा बाआबादकारी जरूरतें लेई 555 करोड़ रपे कोला मती दी रकम मंजूर कीती ही। सरकार नै समूलचे मुल्ले च कुदरती ते गैर कुदरती करोपिणं दे असरदार ढंगै सिर प्रबंधन गी जकीनी बनाने लेई केई गैह पुटिटियां न ते चालू माली ब'रे दरान राज्य आपदा मोचन कोष दे तैहत 28 राज्यें गी 19 जहार करोड़ रपे कोला मते दी रकम जारी कीती।

<><><><><><>

Asia Wrestling

जॉर्डन दे अम्मान च एशियाई कुश्ती चैंपियनशिप-2025 च भारती पलोआन मनीषा भंवाला होरें सुन्ने दा तगमा जित्तेआ ऐ जिसलै के अंतिम पंधाल होरें कैह दा तगमा हासल कीता ऐ। महिलाएं दे 62 किलोग्राम भार वर्ग दे फाइनल च मनीषा नै कोरिया दी ओके जू किम गी 8-7 कन्नै हराया।

53 किलोग्राम भार वर्ग दे प्ले-ऑफ च कैह दे तगमे लेई खेड्ढे होई अंतिम पंघाल नै ताइपे दी मेंग एच हिसएह गी तकनीकी म्हारथ दे दम उप्पर शिकस्त दित्ती। भारती पलोआनें हूनै तगर टूर्नामेंट च सुन्ने दा इक तगमा, चांदी दा बी इक तगमा ते कैह दे 6 तगमे जित्ते न। मर्दे दी फ्रीस्टाइल प्रतियोगिता अज्जै थमां शुरू होआरदी ऐ।

<><><><><><>

IPL

आईपीएल क्रिकेट च चेन्नई च कल रातीं खेड्ढे गेदे इक मैच रॉयल चैलेंजर्स बैंगलुरु नै चेन्नई सुपर किंग्स गी 50 रंजें कन्नै हराई दित्ता। पैहले बल्लेबाजी करदे होई आरसीबी दी टीम नै 7एं विकेटें दे नुक्सान पर 196 रंज बनाए जेह्दे परते च चेन्नई दी टीम 20एं ओवरें च 8 विकेटां मोहाइयै 146 रंज गै बनाई सकी। अज्ज संजा अहमदाबाद दे नरेन्द्र मोदी स्टेडियम च संजा साढ़े 7 बजे गुजरात टाइटंस दा मकाबला मुंबइ इंडियन्स कन्नै होग।

<><><><><><>